

Dioxine ! ... Dioxine !... Dioxine ! ... Dioxine !



On nn' àrèt bin càzé, dul dioxine, dupwis kinze djoûs !

Toutes les afwêres ki k' cheuyat la Bèljike dupwis kéke timp, (dju sondje às tuwrîes du Brabant, a l' afwêre Cools, a Dutroux et às afants sacrificiyîs (avu toutes les nictés k' ont chû - *avec toutes les compromissions qui ont suivi*) - la Smap, Augusta et Dassault avu les partis politikes poûris - Interagri et Eric Matton - lu dopadje - la vatche fole et asteûre les aliments apwazounés, sins sawè tous les ôtes), èt ki pörint t' ossi bin k' cheûre les ôtes pâyis k' nouzôtes (sondjèz ou sang contaminé a France), nu sont ku l' ruflèt d' ène civilizacion du fin d' siéke ki va al dèrive.

Les payis d' Europe, k' avint counu deus guêres su 25 ans, ont oyu la chance d' awè des grands oumes politikes pou z a tirer la lçon et taper les nivôs d' in nouvê bâtichadje du l' Europe !

Il ont fwêt in boukèt dul vôle, mès il a dmère co tant a fwêre. L' idèyal k' avint les Schuman, Adenauer, Spaak et lz' ôtes est dja bin lon, si nin rouvîyî. La djerméye d' après zès nu put mà d' les valu.

Onz è vu s' mète a place ène politike d' êjance, du chûrté , du plêji, du profit et d' combines. Les vies valeurs du respèt, d' onèt' té, du civisme, du consiance et du dwâr ont sté rtchèssîes bin lon, ostant, si nin dpus, dins l' monde politike, k' a costé.

Ki ç' ki fwêt co l' èfôrt anute ? Cè k' on aprind co a scole ? Tout ç' k' on è drèt, rin du ç' k' on dot. (*tout les droits et rien des devoirs.*)

Çu n' est nin ç' ku nous moustrat nôs mon.neûs ki va rmète ça du sgure (*d' équerre*)

Dioxine !

I gn è pou s' a rinde compte ku du vèy la pagaye du nos ministères du l' agriculture et dul santé dins l' afwêre dul dioxine et dl' intèrieur dins les élécions.

Tous les fabricants d' amougnî pou les biêsses ont in permis ku l' minisse les î è dné.

Ça dvot don z-èsse in djeû pour zès d' établi la lisse ku la CEE dmandot.

Eh bin non ! Il è falu kékes nutes a nös minisses pouz a discuter et il è co falu ku ça sùje la fédèracion ki fwêje la lisse a leû place. Fât nin dmander cè k' il avint co a catchî, et kî ?

Fât nin dmander les pouûsadjes flaminds et ôtes k' i gn è yu pou stoûfer l' afwêre duvant les élécions; fât nin dmander l' muzladje k' onz è impözé às gazètis. Et tout ça, tins k' les djins avalint la dioxine a toûr du brès !

Nosse prèmi cok, Jean-Luc Dehaene, nous è prèvnu ou landmwîn dul plûzée des élécions. La note surèt salée et la seulmint k' ça cmince. Loû, lu batant et l' bouteû, k' avot toudi wêtî du tnu l' èglîje ou mitan du viadje è sté l' prèmi a payî la note. Abandonné, lâchî, trahi p' às sin.nes, il ava, lu kûr gros, et dègouté a jamwès dul politike.

Ça nous a promèt des bèles pou les djoûs a vnu !

Duavant in parèy pagaye, nin ètounant k' la CEE è pris lès pus dères muzères k' ont yu pou èfèt d' touctchî co d' pus les onêtes djins ku les trichmanes du plat pâyi.

Nin k' dju vuje soutnu la coumission, lon d' la. Ile duvrot sayî d' fwêre à mî, mès coumint z-a rèchu cand , du d' padri, les amèrluches tirat toutes les ficèles a leû profit. Tout ç' ki ravale l' Europe, a tous les nivôs , c' est du pwin bèni pou les amèrikins et i n' su jin.nat nin pou nous mète a l' abat pa tous les moyins. Dju n' su nin l' seûl al dire.

Ruljèz l' Avnir du Lucsambour du 10 du jwin 1999. Les francès Paskwa et de Villiers î djat : "Derrière les fonctionnaires européens, il y a 3.000 lobbies qui travaillent dans l' ombre; ils les poussent à pondre ces règlements absurdes, par exemple, sur les rainures des remorques de voiture, pour aider l' une ou l' autre multinationale à empocher les marchés".

I parvunat min.me a rfuser l' agrémint a in abatwar du fond dul Laponie, du fèt k' i gn è pon d' frigo, adon k' il î fwêt 37 ° duzous zéro. Ça promet !

Louwis Bêdjot, 15 du jwin 1999.

Suite.

💰 C' est nin co fini !

Du ç' sumwin.ne ci, onz è polu rdrovu les abatwârs. Les élècsions èstant oûtes, ça n' siève pus a rin d' ameuter les djans ! I dmère lu lacê, ku tout l' monde s' acwâde a dire BON èt k' les Francès (zès co in côp) rubutat toudi, coume s' il astint pus propes ku nouzôtes. I n' su souvnat dja pus k' il ont foutu l' sida à des çantin.nes du djans, si nin dpus, a câze du maneûves criminèles asprouvées p' âs minisses zès min.mes. N' est-ce nin co pus grave ku la dioxine ? Frint bin d' chouver dvant leûz uchs !

Adon k' al coumission, on rucounut bon nosse lacê, ku toutes les lêtrîes débordât du d' partout, k' ène décision est ratindue pa toutou, on n' parvint min.me niñ a convoker sul pîd, sul tchamp les artisses (*vétérinaires*) CEE . C' est l' "week end"! On wârèt bin mârdis.... N' est- c' nin tout bounmint scandaleu ? Co kékes millions sul dos des cinsîs !

Ces djans la, k' on paye bramint trop cher (avu nôs sous, nul rouvièz nin), duvrint sondjî k' c' est su nosse dos k' i bâtchat leu prope fortune, et ku lu trajike dul situwacion valot bin k' i s' jinninje in pô.

L' Europe..., ahy..., putète..., mês chûr nin insi !

🕊 Èt après ?

Asteure ku la panike s' è in pô apwêri, on lit des comunikés dins les gazètes, mêtus p' ôs cîs k' avint sté niches et ki sayat pa tous moyins du s' rulaver. Alz atinde, i lavat pus blanc k' Dash û k' Ariel !!!

Des ôtes su vantat du n' vinde ku yôk du blanc coume nîve, ki n' è jamwês vu d' antibiotique ni d' vermifuge, ni d' tout près, ni d' à lon,..... **et i sont âs pris des ôtes....!!!** Coumint fjat-i ? Cand ç' k' il anonçat srèt vrê, la, eh bin !, leus pris âront doublé. Les mirâkes nu s' fujat nin coume ça !

Coca Cola, ç' côp ci, rumet ça. On vint du rmète les coks a l' étal; vla k' on rsatche tous les Coca. Parètrot k' ça vanrot des palètes ? Si c' est vrê, c' est k' les djans rulètchat les canètes... Dju n' wès nin bin coumint ku l' fongicide des palètes su rtrouvrot dins l' Coca, a mwins k' i n' ârint rlavé les boutyies avu l' êwe des palètes !!!

I dja co k' il ont yu du mwês Co2. C' est dvant k' i l' falot vèy, nin après ! Coumint k' on pu s' pèrmète du djouwer insi avu la santé des djans ?

Ène chòse est chûre, c' est ku si toutou fjiot sa bzougne coumifât, ça n' arivrot nin. Et c' est dins tout parèy !

Lu sang ârot sté pur, la farine du viande ârot sté bin fwête, les grêsses n' ârint ni sté machîes (*mélangées*), lu Co2 ârot sté conforme et z' a vlèz, vous nn' ârez !

Onz è tapé s' la farine du viande k' è amon.né l' mâ dul fole vatche. Si on trouve k' i gn è l' pus ptit dandjî, k' on la rtire û putot k' on la fwêje d' ène ôte manière ! Fât cand min.me admète k' on s' a n è siêrvu des ans dérant sins s' a plinde. Si on s' avot tnu al boune mètode du fabricacion al place du sayî d' rapiner s' les frês et si tchèkin avot fwêt sa bzougne a mode de djans, gn ârot ptête jamwês pont yu d' fole vatche.

